

Penduduk Sipitang bakal menikmati pembangunan

DE 14/11/2011 5

WESTON: Warga Sipitang bakal menikmati pembangunan infrastruktur memberangsangkan apabila Petronas melaksanakan projek bernilai RM4.5 bilion awal tahun depan.

Anggota Parlimen Sipitang Datuk Sapawi Ahmad berkata ini termasuk projek pembinaan jalan raya, penyambungan bekalan elektrik dan bekalan air di kawasan itu.

Mengikut perancangan, Petronas melalui Petronas Chemicals Group Bhd (PCG) akan membina sebuah kompleks kilang baja bertaraf dunia di daerah itu, dan projek yang dikenali sebagai SAMUR itu akan mula dibina pada suku kedua tahun depan dan dijangka beroperasi pada tahun 2015.

"Saya yakin dengan kehadiran projek Petronas ini, penduduk Sipitang akan memperolehi manfaat daripadanya terutama pembangunan infrastruktur.

"Pembinaan paip baru bernilai RM50 juta kini dalam pelaksanaan bagi menyelesaikan rungutan masyarakat berkenaan masalah bekalan air di zon Sindumin dan Weston," katanya semasa berucap pada majlis pemimpin bersama rakyat di sini pada Ahad.

Pada majlis tersebut, Sapawi turut menyaksikan program penyerahan 86 anak-anak mahasiswa dan mahasiswi Universiti Malaysia Sabah (UMS) kepada keluarga angkat masing-masing yang terdiri daripada penduduk Pekan Weston sendiri.

Menyentuh mengenai program UMS tersebut, Sapawi berharap kehadiran pelajar untuk membuat penyelidikan akan membawa kepada transformasi pelan pembangunan eko-pelancongan.

"Dengan pembangunan eko-pelancongan, ia mampu memimpin kepada pembangunan masyarakat sekali gus pembangunan ekonomi setempat.

"Kita ada perumahan persisiran pantai yang mana kini dalam proses pembinaan titian yang bernilai RM 3.5 juta," tegasnya.

Sapawi turut berharap kajian yang dijalankan mendapat kerjasama dari Ko-Nelayan dan Komuniti 1Malaysia bagi mengerakkan program kemasyarakatan melalui konsep 1Malaysia.

Turut hadir pada majlis tersebut adalah Timbalan Pengarah Penerangan Negeri Yunus Sapirin.

Sapawi bersama rombongan ketika melawat projek titian yang bernilai RM3.5 juta.

